
КУБОК МУСОБАҚАЛАРИ ЯКУНЛАНДИ

2017 йилнинг 28-30 июнь кунлари Фарғона олимпия захиралари коллежида Аҳмад ал-Фарғоний кубоги учун 4-анъанавий таэквондо ИТФ бўйича очик халқаро турнири бўлиб ўтди.

Унда республикаимизнинг барча вилоятларидан ва Қозоғистон Республикасидан 300 нафардан ортиқ сараланган спортчилари иштирок этишди. Турнирда 17 ёшгача бўлган ёшлар 25 вазн тоифасида куч синашдилар.

– Халқаро турнирнинг вилоятимизда ўтказилаётгани бежиз эмас. Чунки кейинги вақтларда вилоятимиз таэквон-дочилари турли мусобақаларда яхши натижаларни қўлга киритмоқда, – дейди Фарғона вилояти анъанавий таэквон-до федерацияси раиси Ботиржон Баҳодиров. – Жумладан, Ўзбекистон Республикаси Олий Мажлисининг “Ҳеч нарса мамлакатни спортчилик тез дунёга танитолмайди” номли гранти асосида шу йил 4-8 июнь кунлари 8 нафар спортчимиз Германияда ўтказилган “Германия опен” халқаро турнирда иштирок этди. 9 та давлатдан 270 нафардан зиёд энг кучли спортчилар қатнашган халқаро турнирда спортчиларимиз вилоятимиз шарафини муносиб ҳимоя этишди. Нодира Муҳаммаджонова 2 та йўналишда 2 та олтин, Темур Муҳаммаджонов 3 та йўналишда 3 та олтин, Одилбой Абдубаннопов 1 та йўналишда 1 та олтин, Дилдора Миркомилова (Қува туманидан) 1 та олтин, 1 та кумуш, Гулноза Солиева 2 та йўналишда 2 та кумуш медалларни қўлга киритишди.

Мурасиз ва қизғин курашлар остида ўтган кубок мусобақалари ниҳоят ўз якунига етди. Барча рақибларни доғда қолдирган вилоятимиз вакиллари 1-, Сирдарё вилояти ёшлари 2- ва Тошкент вилояти спортчилари 3-ўринни эгаллаб, кубок соҳибига айландилар.

Яккалик баҳсларида вилоятимиз спортчиларидан Оқилжон Умаржонов, Темурбек Муҳаммаджонов, Акмал Қорабоев, Моҳигул Муҳаммаджонова, Мухтасар Одиловалар ўз ҳисобига биттадан олтин медални ёздириб, Фарғона вилоятининг умумжамоа ҳисобида пешқадамликни қўлга киритиб, кубок соҳиби бўлишига муносиб ҳиссаларини қўшишди.

Ғолибларга вилоят ҳокимлигининг ҳамда Фарғона вилоят таэквондо федерациясининг қимматбаҳо совғалари, диплом ва медаллар топширилди.

Айни кунларда вилоятимиз таэквондочилари 2 август куни Жанубий Кореянинг Инчон шаҳрида ўтказиладиган Осиё чемпионатида тайёргарлик кўришмоқда.

2017-07-06 15:57:44